

Date - 23/11/2025 Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Mizorama Myanmar raltlan awmte kutzia leh mitnaute thla lak hna thawh mekah za zela 60 thelh zawh fel a ni tawh.
2. Zirtawpni atanga tan Mizoram Baptist Kohhran rorelna sang ber dawttu Area Baptist Council (ABC) inkhawmpui chu zanin hian a tiak ang.
3. Mizoram leh Telangana ten nimin khan sports hmasawanna tura thawhhona thuthlung an ziak.
4. G20 khawmpui kar lakah Prime Minister Narendra Modi-a leh South Africa President, Cyril Ramaphosa te vawiin khan ram pahnih chungchangah an inbia.



BIOMETRIC ENROLMENT

Mizorama Myanmar raltlan awmte kutzia leh mitnaute thla lak hna thawh mekah za zela 60 thelh zawh fel a ni tawh.

Home department atanga thu dawn danin Mizorama Myanmar raltlan awm mek,mi 31,214 ni thin chu tun hnai-ah tlem leh hretin mi 30,815 awm mek anga chhinchhiah a ni a. Chu'ng zinga mi 18,265 te chu biometric enrolment a chhinchhiah tawh

an ni a. Raltlan awm zat atanga chhut a za zela 59 point 27 a ni. Bangladesh raltlan 2,356 awm mek zinga za zela 11 thelh chu an kutzia leh mitnaute thla laksak an ni tawh bawk. Aizawl district-ah hian Myanmar raltlan 4,000 bawr vel an awm a, an kutzia leh mitnaute thla laksak hna hi zawhfel tep a ni tawh a. Raltlan awm tam berna Champhai district leh a dawttu Lawngtlai district-ah te erawh chuan an thatnem tham em avangin za zela chhut chuan chhinchhiah zat a la tam thei lo thung. Home minister Pu K. Sapdanga chuan hna hi thawh zawh hun tur bituk a awm loh thu sawiin, district tinah official-te'n an hna pangngai bakah theihtawpin an thawk chho zel a ni a ti.

Sorkar chhinchhiah danin Myanmar leh Bangladesh atanga raltlan 33,17, Mizoramah an awm mek a. Manipur a chi leh chi intihbuai avanga rawn raltlan ,mi 6,953 an awm mek a. Ram pahnih atanga raltlan leh thenawm Manipura atanga rawn raltlan zawng zawng hi tun dinhmunah an vai-in mi 40, 124 an thleng a ni.

Mizoram leh Myanmar ramri thui zawng hi km 510 angin Home Ministry chuan a chhinchhiah a, Mizoram sorkar chhinchhiah dan erawh chuan km 404 a thui a ni . A dung tluanin Mizoram Police Station 12 a awm mek a, Assam Rifles ten duty post eng emaw zat an nei bawk a. Mizoram leh Bangladesh ramri thui zawng hi km 318 a ni a. Mizoram Police Station 6 awmin BSF duty post eng emaw zat a awm bawk . Manipur nena inrina-ah Mizoram Police outpost 8 a awm a, Assam nena inrina-ah outpost 22 awmin Tripura nena inrina-ah outpost 6 a awm bawk a ni.

Free Movement Regime hnuai-ah Myanmar a lut leh khilam atanga lo lut tur tan border pass pek chhuah thin a ni a. Kumin October ni 30 thleng khan border pass hi 21,238 pek tawh a ni. Pass hi hmun thum - Champhai district-a Zokhawthar, Hnahlan leh Lawngtlai district a Zochachhuah khua-ah te pek chhuah a ni.



CHOLERA

Siaha leh Lawngtlai district-a tuihri (cholera) leng avanga mi 9 bak an thih belh tawh loh lain hri leng hi khaw thenkhatah a darh avangin Myanmar ramri khar zui zel a ni.

Siaha district bawrsap Pu VL Hruaizela chuan a hma a khaw 3 a tuihri leng chu tunah chuan district chhunga khaw 7-ah a darh tawh tih a sawi a. Tuihri avanga mi 3 thi tih loh chu thih belh an awm loh thu a sawi a. Ramri hnaia awm khaw VC-te leh ramri a Police station leh outpost-te pawh Myanmar atanga Siaha district an lo luh theih lohna tura khauh taka ramri khar hna chu kengkawh turin an chah niin a sawi. Zoram Medical College & Hospital laboratory-a hri veite sample an endikna-ah tuihri (cholera) a ni ngei tih finfiah a nih thu bawrsap chuan a sawi bawk.

He tih lai hian tuihri leng vanga mi 6-in thih phahna Lawngtlai district-ah chuan hri kai thar an awm belh tawh lo niin Lawngtlai a kan Corr chuan a sawi a. Lawngtlai district bawrsap Pu Donny Lalruatsanga chuan containment area a Hruitezawl puan pawh nimin khan a hlip a. Chuti chung chuan Myanmar lam atanga lo luh chu khap chhonzawm zel a ni. Bawrsap chuan Lawngtlai district atanga Hruitezawl kaltlanga sumdawngte'n Myanmar lama bungrua an phurh luh a phalsak a, Myanmar atanga mihring leh bungraw lo luh erawh chu khauh takin a la khap zui a. Myanmar lama bungraw phurhluh chungchang pawh fimkhur taka kalpui turin thupek a siam a, hruitezawl village council-te'n Myanmar lam atanga lawng lokir lehte pawhin bungrua leh mihring an phur lo ngei tih lo chian tura hriattir ani a Myanmar atanga lokir lehte pawh an chenna hmun nen VC-te'n an chhinchhiah tur a ni a, ramri hawn a nih hma a ramri lehlam atanga lo lut reng reng chu Foreigners' Act hmanga thubuai siamsak an ni dawn a ni.

(Desk/Lalnggheta Ralte, PTC Lawngtlai)

<><><>

BCM ABC

Zirtawpni atanga tan Mizoram Baptist Kohhran rorelna sang ber dawttu Area Baptist Council (ABC) inkhawmpui chu zanin hian a tiak ang.

ABC-ah Zirtawpni zan khan vantlang inkhawma bultanin nimin nileng khan rorel a ni . Hetah hian ABC atanga nakum March thla a Assembly inkhawmpui a lut tur hrang hrang bakah ABC chhunga inrelbawlina tur hrang hrang rel a ni a. Nizan khan vantlang inkhawm awm lehin vawiin chawhma khan Upa

nemngheh inkhawm buatsaih a ni a. Mizoram chhunga ABC 17 - ah Kohhran Upa 182 nemngheh an ni .

SFX: Kohhran upa nemnghet lai

Vawiin chawhnu khan ABC tinah Lalpa Zanriah Sacrament kilho a ni a, zaninah hian vantlang inkhawmah, ABC Chairman kalchhuak te'n thu an sawi ang.

(Corr/Thangmingliana, PTC Lunglei)

<><><>

WATER SUPPLY

PHE Department hotute chuan khawpui chhunga tui semchhuah hna a kal tluan thu leh harsatna an neih rih loh thu an sawi.

Akashvani News zawhna chhangin PHE department hotute chuan Aizawl khawpui chawmtu tlawng atangin Phase-1, Phase-2 leh Phase-3 hmangin tluang takin tui pump reng a nih thu an sawi a. Tunhnaiah nikhatah tui litre maktaduai 40 te an pump theih thu an sawi a, tui la tam lai, thal tak tak hma ni si a la nih avangin Aizawl khawpui chawmtu mai bakah Mizoram hmun dangah pawh harsatna an neih rih loh thu an sawi a. A hmaa chhe reng thin Phase-3 pawh tun thla tir atana hman tan theih ani thu leh tluang takin khawpuiah chawl loin tui a pump mek tawh thu an sawi a ni.

PHE department hotute chuan tlawng tui chu duh ang tawk an hmuh thu leh a tam lam leh a tui fim zawngah pawh a that lai tak a nih thu an sawi a. Tui a hnianghnar viau laiin khawpui chhunga semzaina lam chuan duhthu a sam tawk tawh loh thu leh tui semchhuah tam lam, distribution network chu tun aia darhzau leh chak zawk turin hma an lak mek thu an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl

Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



MIZORAM, TELANGANA SPORTS

Mizoram leh Telangana-ten nimin khan sports hmasawna tura thawhona thuthlung an ziak.

Telangana - North East Connect: A Techno-Cultural Festival-ah sawm a nih angin Sports & Youth Services Minister hoin thuthlung hi ziah a ni a. State pahnih official ten an ziah hnuah nizan khan Telangana Larsap Pu Jishnu Dev Varma leh Minister Pu Lalnghinglova Hmar ten an inhlan a ni.

He festival-ah hian Spirit of the Game: Connecting Telangana and the North East' thupui hmanga nimina sawihona hun hmanah Minister Pu Lalnghinglova Hmar chuan Mizoram chuan football leh discipline thenkhata an hlawhtling angin Olympic sports danga hlawhtlin dan kawng an dap mek thu a sawi a. Emerging Mizoram Sports (EMS) kalpui a nih dan tur pawh sawiin state pum dapa talent zawn chhuah hna thawh dan turte leh chumi kawngah chuan Telangana nena infiammite intlawn tawn, coach inkal pawh tawn leh Telangana state-in sports hmunhma a neihte Mizoram infiammiten man chawi loa training-na atana an hman theih dan tur rawtna a thlen bawk a ni.

(PR)



MIZORAM-CACHAR BORDER FEST

Cachar District Administration chuan Assam leh Mizoram mipuite inlaichhinna tha zawk a awm theih nan naktukah Dholai-ah 'Border Festival' a buatsaih dawn.

Akashvani news thudawn danin he hunah hian Assam leh Mizoram mipuite inkara inzawmna thar siam a nih theih nan hnam zia rang entirna hun hman a ni dawn a, infiamna hrang hrang huaihawt a nibawk ang. Hemi chungchang ngaihtuah hian Zirtawpni kalta khan CDC Dholai office-ah thutkhawm a ni a.

State pahnih atanga official kalkhawm te chuan he hun hlawhtling taka hman a nih theih nana inbuatsaihna hrang hrangte an thlrho a. Thutkhawmah hian Mizoram aiawhin Vairengte SDO (Civil) Pu H. Vanlalbiakzauva leh Mamit SDO (Sadar) Pu Lalnunfela Chawngthu te an tel a. Cachar lam atangin DDC Cachar, Pu Norsing Bey an thutkhawm hi a kaihruai a, District administration pahnih te inkara inthlunzawmna tha awm a tul thu a sawi a ni.



PM HOLD BILATERAL MEETING

G20 khawmpui hmanga South Africa ram khawmpui, Johannesburg-a thang mek, Prime Minister Narendra Modi-a leh South Africa President, Cyril Ramaphosa-ten vawiin khan ram 2 inkungkaihna chungchangah an inbia a, External Affairs Ministry thupuangtu, Randhir Jaiswal-a'n X-a a tarlan danin, hruaitu 2-te hi boruak tha tak hnuaiyah an inkawm a, Prime Minister Modi-a hian G20 khawmpui, hlawhtling taka an thlen avangin President Ramaphosa leh South Africa hnenah lawmpuina a hlan a ni.

Hruaitu pahnihte hian thil dang bakah sumdawmna, sum peipunna, artificial intelligence, Digistal Public Infrastructure, skill development leh food security lama ram 2 inkungkaihna tih that leh zual dan turte an sawidun a ni.

(NSD)



VIETNAM RAIN HAVOC

Vietnam-a tuilian leh leimin vanga thi chu 90 an tling tawh a, mi 12, chin hriat lohvin an la awm mek bawk. Ruahsur nasa leh tuilian hian chenna in 1,154 leh buh bal hmun, hac. 80,800 chuang a tichhia a, US dollar maktaduai 356 thelh hu a tichhia a ni.

Chhawldawl hna thawh nan Vietnam sorkar chuan US Dollar maktaduai 17 leh nuai 93 a ruahman a, Vietnam Prime Minister chuan tuilian leh leimin tawrhna hmunah, nasa zawka chhanchhuah leh chhawmdawl hna thawk turin thuneitute a hriattir a ni.

(NSD)

